



Derasaziun geografica da las duas partidas PBD e PCD entaifer il Grischun.
GRAFICA PBD/PCD

PBD e PCD preparan la fusiun

La basa da las duas partidas po uss s'exprimer en ina votaziun consultativa

MARTIN CABALZAR/FMR

■ **Sin plaun naziunal furman PCD e PBD dapi il cumenzament da l'onn la nova partida l'Allianza dal Center (AdC). En il Grischun po la basa da tuttas duas partidas s'exprimer ils proxims dis a moda consultativa davart num e fusiun. La decisiun definitiva vegn alura a crudar a las radunanzas da delegads e delegads al cumenzament da zercladur.** Sche tut va sco planisà duai ina radunanza extraordinaria decider la fin da zercladur definitiva davart la fusiun ed ils novs statuts. En il decurs da l'avust quintan ins da pudair convocar l'emprima delegada da la nova partida che duai sa numnar, respectond la trilinguitad grischuna, «Die Mitte Graubünden, Allianza dal Center Grischun ed Alleanza del Centro Grigion». Quai han confermà tant il parsura da la PCD grischuna *Kevin Brunold* sco il parsura da la PBD grischuna *Beno Niggli* vers la FMR. La decisiun davart la fusiun fa numnadain prescha, pertge gia la primavaira 2020 han lieu elecziuns tant da la regenza sco dal Cussegl grond. Dal parlament schizunt tenor in nov modus electoral che pretenda da las partidas er dapli preparaziun.

Nagina meglra alternativa

Tuts dus parsuras èn persuadids che la fusiun planisada vegnia a gartegiar, i na dettia la finala betg in'alternativa. Uschia recumonda tant la grupp da project sco ils directoris da tuttas duas partidas tant la fusiun sco la midada dal num. «Tar la PCD è er la fracziun dal Cussegl grond s'exprimida unanimamain persuerter», punctuescha Kevin Brunold. Tar la PBD hai bain gia dà cun *Oliver Hohl* (nov PLD) e *Benjamin Hefti* (nov PPS) dus dissidents. Damai che la delegada da la PBD haja dentant decidì cun 228 cunter 11 per restar en la Allianza dal Center sin plaun naziunal è el persuadì ch'i dettia er il zercladur in ferm GEA per la fusiun. Tant Niggli sco Brunold conferman che singuls commembers pli vegls han – per motivs istorics – dapli resalvas tar la fusiun ch'ìls giuven. La confessiun na gioghia oz betg pli ina rolla talmain relevanta, pli impurtant saja da rinforzar las forzas en il center. Quai saja sa resultà or d'ina analisa approfondada da la situaziun da partenza e suenter avair examinà autras opziuns, che sajan la finala sa musadas sco nagina alternativa.

Tge accents metta la nova partida?

Tenor ils dus parsuras actuals duai l'Allianza dal Center «manar vinavant la ierta politica cuminaivla da PCD e PBD dal

Grischun, interpretar da nov e sviluppar vinavant quella en in mund che sa mida permanentamain». La finamira primara saja da rinforzar la politica dal center sin il stgalim communal, regiunal, chantunal e naziunal. «La AdC duai porscher in dachasa politic per tut quels che s'engaschan per ina convivenza solidarica, cun responsabladad e respect e che respecta la dignitad umana», scrivan las duas partidas en lur messadi communal. Novs accents vul la partida fusiunada er metter

sin la promoziun da las dunnas e da la giuventetgna. S'engaschar vul la nova partida vinavant per las finamiras politicas tradiziunalas da PBD e PCD sco distgargiar e promover las famiglias, ils manschis pitschens e mesauns, mantegnair e crear novs posts da lavur, per ina ferma agricultura, per rinforzar las regiuns da muntogna e da la periferia e per in bun service public. Suenter la fusiun vegni l'Allianza dal Center ad elavurar in program da partida sco mussavia per expo-

nents ed orientaziun per la populaziun, sincereschans ils responsabels.

Finamiras personalas detg ambiziusas

Las finamiras quantitativas da l'Allianza dal Center en il Grischun èn detg ambiziusas. Per pudair sviluppar e realisar ideas e projects vul ella esser preschenta en tut (!) las regiuns e vischnancas dal Grischun cun esser bain represchentada en ils presidis communal, en las suprastanzas communalas ed en ils parlaments communal. La AdC vul daventar la pli gronda fracziun en il Cussegl grond ed esser la pli ferma partida en la regenza. Ella vul plinavant defender in mandat en il Cussegl dals chantuns ed acquistar la pli gronda cumpart d'electuras ed electurs en las elecziuns dal Cussegl naziunal. Actualmain han PCD e PBD ensemen radund 2500 commembers, 44 (26/18) secziuns localas, 51 deputads (31/20), 3 sutgas en la regenza (2/1), e mintgamai in represchentant en il Cussegl dals chantuns ed en il Cussegl naziunal.

Ils gremis da partida duain consistier d'ina radunanza generala, ina suprastanza chantunala, in directori ed in post da revisiun. Presumà che la fusiun reuseschia vegnan las duas fracziuns dal Cussegl grond a s'unir en ina suletta. A las partidas regionalas, circuitalas e localas vegn laschà liber, sch'ellas surpiglian il nov num da la partida naziunala e chantunala, ni sch'ellas vulan mantegnair vinavant lur num actual. Lur independenza resta garantida. «Er sche la votaziun consultativa nun ha nagina vigur legala, è ella tuttina impegnativa per las ulterius preparativas per mauns da las radunanzas da delegadas e delegads da las duas partidas che decidan alura definitiva-main», sincereschans tant Kevin Brunold sco Beno Niggli unisono.

	PCD GR	BDP GR	Total
Commembas e commembers	1777	691	2468
Partidas regionalas, circuitalas e localas	26 (6/10/10)	18 (4/13/1)	44 (10/23/11)
Partidas giuvas	1 (supplementarmein PCD Giuvna Surselva)	1	2
Partida cantunala Dunnas	1	-	1
Partida cantunala 60+	1	-	1
Cumminonza da lavur per l'economia e la societad (AWG)	1	-	1
MCommembers dalla Regenza	2	1	3
Commembers dil Cussegl grond	31	20	51
Commembers dalla dertgira cantunala e dalla dertira administrativa	4	1	5
Commembers dil Cussegl dils stans	1	-	1
Commembers dil Cussegl naziunal	1	-	1

tuttas indicaziuns stan mars 2021

Indicaziuns statisticas – da delegads e delegaziuns.

TABELLAS PBD/PCD

	PCD GR	PBD GR
Radunanza da delegai	GIE	GIE
Suprastonza da partida	GIE	GIE
Giunta	GIE	GIE
Post da revisiun	GIE	GIE
Fracziun dil Cussegl grond	GIE	GIE
President da partida	Kevin Brunold	Beno Niggli
Vice-presidents da partida	Yvonne Brigger-Vogel Alessandro Della Vedova	Aita Zanetti Christian De Tann
President da fracziun	Dr. Reto Cramer	Gian Michael
Vice-presidents da fracziun	Dr. Carmelia Maissen Tino Schneider	Daniel Buchli
Commembers dalla Regenza	Dr. Mario Cavigelli Marcus Caduff	Dr. Jon Domenic Parolini
Commembers dil Cussegl dils stans	Stefan Engler	-
Commembers dil Cussegl naziunal	Martin Candinas	-

Organs da partida – da las giuntas en fin en il Cussegl naziunal.

	PCD GR	PBD GR
Resultats dallas elecziuns dil Cussegl grond 2014 (quota da sezs procentuala)	31 sezs 25.8 %	27 sezs 22.5 %
Resultats dallas elecziuns dil Cussegl grond 2018 (quota da sezs procentuala)	30 sezs 25.0 %	23 sezs 19.2 %
EResultats dallas elecziuns dil Cussegl naziunal 2015 (incl. partidas giuvas)	16.81 % 1 mandat	14.48 % 1 mandat
Resultats dallas elecziuns dil Cussegl naziunal 2019 (incl. partidas giuvas)	16.35 % 1 mandat	9.1 % 0 mandats

Resultats elecziun – a level chantunal e federal.

Gruppa da lavur PBD/PCD Grischun

PCD: *Kevin Brunold* (parsura da partida e manader da project), *Yvonne Brigger-Vogel* (viceparsura), *Alessandro Della Vedova* (viceparsura), *Reto Cramer* (parsura da fracziun).

PBD: *Martin Bettignaglio* (commember dal directori e substitut dal manader da project), *Beno Niggli* (parsura da partida), *Aita Zanetti* (vicepresidenta) e *Gian Michael* (president da fracziun).